



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KEEMPAT
MESYUARAT PERTAMA**

K A N D U N G A N

UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Status Cadangan Pindaan Perlembagaan Persekutuan
Bagi Memudahkan Ibu-Ibu Mendapatkan Kerakyatan
Anak-Anak Yang Dilahirkan Di Luar Negara Yang
Mempunyai Bapa Bukan Warganegara Malaysia**
- *YB. Dato' Sri Azalina Othman Said (Pengerang)* (Halaman 1)
- **PPR Pelangi Indah dan Isu Gelandangan
Semakin Serius**
- *YB. Tuan Steven Choong Shiau Yoon (Tebrau)* (Halaman 3)

MALAYSIA
KAMAR KHAS
PARLIMEN KEEMPAT BELAS
PENGGAL KEEMPAT
MESYUARAT PERTAMA
Isnin, 11 Oktober 2021
Mesyuarat dimulakan pada pukul 2.30 petang
DOA

*[Tuan Yang di-Pertua **mempengerusikan Mesyuarat**]*

UCAPAN DI BAWAH USUL
BERKENAAN PERKARA TADBIR KERAJAAN (P.M. 17)

**Status Cadangan Pindaan Perlembagaan Persekutuan
Bagi Memudahkan Ibu-Ibu Mendapatkan Kerakyatan
Anak-Anak yang Dilahirkan Di Luar Negara yang
Mempunyai Bapa Bukan Warganegara Malaysia**

2.39 ptg.

Dato' Sri Azalina Othman Said [Pengerang]: *Bismillahi Rahmani Rahim. Assalamualaikum warahmatullahi wabarakatuh.* Tuan Yang di-Pertua, pada ketika ini, mengikut Perlembagaan Malaysia, taraf kewarganegaraan bagi anak pasangan wanita tempatan dan lelaki warga asing yang berkahwin secara teratur dan diiktiraf serta dilahirkan di luar negara akan mengikut taraf kerakyatan bapanya.

Ketetapan ini dibuat bagi mengelakkan berlaku situasi anak dilahirkan pasangan berkenaan mendapat dua kewarganegaraan. Jika belum mendapat taraf warganegara ikut bapa, maka taraf kewarganegaraan untuk anak tersebut boleh dimohon di bawah Perkara 15(2).

Namun begitu, perkara ini amat menyukarkan para ibu warganegara Malaysia yang berkahwin dengan warga asing kemudian melahirkan anak di luar negara. Kebanyakan kes yang kita dengar, mereka mengalami pelbagai kesukaran termasuklah daripada aspek kewangan dan akhirnya anak tersebut yang akan menjadi mangsa.

Baru-baru ini, pada 22 September 2021, Menteri Dalam Negeri telah menyatakan keputusan kerajaan untuk mengemukakan rayuan dan memfailkan permohonan untuk menangguhkan pelaksanaan keputusan Mahkamah Tinggi Kuala Lumpur berhubung pemberian kewarganegaraan secara automatik kepada anak yang dilahirkan di luar negara oleh wanita warganegara Malaysia yang berkahwin dengan pasangan warga asing, merujuk kepada kes Suriani Kempe.

Oleh yang demikian, saya ingin bertanya beberapa soalan kepada Kementerian Dalam Negeri iaitu pertama, apakah polisi baharu kerajaan supaya anak-anak yang dilahirkan di luar negara oleh ibu warganegara dan bapa bukan warganegara dapat diberikan kerakyatan dengan lebih mudah? Apakah komitmen kerajaan untuk menggubal Perlembagaan Malaysia supaya anak-anak yang dilahirkan di luar negara oleh ibu warganegara dan bapa bukan warganegara dapat diberikan kerakyatan dengan lebih mudah?

Kedua, apakah jangka masa untuk kerajaan meminda Perlembagaan Persekutuan termasuk untuk mendapat perkenan Majlis Raja-Raja selaras dengan Perkara 159(5) Perlembagaan Persekutuan bagi memudahkan ibu-ibu melahirkan anak mereka di luar negara walaupun berkahwin dengan warganegara asing. Ribuan terima kasih saya ucapkan kepada Tuan Yang di-Pertua dan Yang Berhormat Timbalan Menteri.

2.36 ptg.

Timbalan Menteri Dalam Negeri I [Dato' Sri Dr. Haji Ismail bin Haji Mohamed Said]: *Bismillahi Rahmani Rahim. Assalamualaikum warahmatullahi wabarakatuh.*

Tuan Yang di-Pertua, untuk makluman Ahli Yang Berhormat, saya mewakili Kementerian Dalam Negeri turut bersimpati dengan kes-kes ibu warganegara Malaysia yang berkahwin dengan lelaki bukan warganegara yang melahirkan anak di luar negara, kerana Perlembagaan tidak memperuntukkan untuk anaknya diberikan taraf kewarganegaraan secara kuat kuasa undang-undang.

Namun demikian, tanggungjawab sebagai Ahli Anggota Pentadbiran Kerajaan yang telah bersumpah untuk menjunjung Perlembagaan Persekutuan, kami terikat dengan Perlembagaan dan perundangan sedia ada dalam negara berhubung dengan kewarganegaraan yang diperuntukkan dalam Bahagian III, Perlembagaan Persekutuan dan Kaedah-kaedah Kewarganegaraan 1964.

Kementerian Dalam Negeri yang berada dalam keadaan terhimpit di atas keputusan Mahkamah Tinggi Kuala Lumpur iaitu kes Suriani Kempe dan enam lagi lawan Kerajaan Malaysia dan juga kes Mahisha Sulaiha Abdul Majeed lawan Ketua Pengarah Pendaftaran Negara dan dua lagi berhubung isu pentafsiran perkataan 'Bapa' dalam Jadual Kedua, Bahagian II, Seksyen 1(b) dan 1(c) Perlembagaan Persekutuan.

Keputusan kes ini menyebelahi kerajaan dan telah dibuat rayuan oleh Mahisha Sulaiha Abdul Majeed kepada Mahkamah Rayuan dan akan dibicarakan pada bulan November 2021. Setelah menerima keputusan yang berbeza,

kementerian bercadang untuk membawa perkara ini bagi mendapat polisi baharu kerajaan untuk meminda Perlembagaan bagi memudahkan ibu-ibu melahirkan anak mereka di luar negara walaupun berkahwin dengan warganegara asing. Dalam masa yang sama, perkara ini perlu mendapat persetujuan Majlis Raja-Raja selaras dengan Perkara 159(5) Perlembagaan Persekutuan. Oleh demikian, kerajaan telah mengambil keputusan untuk merayu dan memohon *stay of execution* iaitu penangguhan pelaksanaan keputusan Mahkamah Tinggi Kuala Lumpur Suriani Kempe dan enam lagi lawan Kerajaan Malaysia bagi mengelakkan *contempt of court* dan pada masa yang sama supaya tidak melanggar Perlembagaan Persekutuan.

Terima kasih, Tuan Yang di-Pertua.

PPR Pelangi Indah dan Isu Gelandangan Semakin Serius

2.38 ptg.

Tuan Steven Choong Shiau Yoon [Tebrau]: Tuan Yang di-Pertua, Yang Berhormat Menteri Kementerian Perumahan dan Kerajaan Tempatan, saya ingin menyampaikan masalah-masalah yang dihadapi warga yang tidak mampu menyewa rumah swasta oleh sebab pandemik COVID-19 yang buat ramai hilang mata pencarian di Johor Bahru.

PPR sudah menjadi pilihan utama bagi golongan B40 dan permintaan rumah PPR sudah melonjak banyak sejak beberapa bulan kebelakangan ini. Ada ramai yang hilang mata pencarian dan tidak diberi rumah PPR sehingga ada yang terpaksa bermalam di dalam kereta, di kaki lima dan di bawah jambatan. Mereka telah bertambah kepada keseriusan masalah gelandangan di Johor Bahru.

Soalan-soalan saya untuk dijawab oleh Yang Berhormat Menteri KPKT adalah seperti berikut:

- (i) apakah sebab yang buat PPR Pelangi Indah yang lama sudah disiapkan pembinaan tetapi masih belum menerima penghuni-penghuni;
- (ii) sekiranya, projek ini mengalami masalah tertentu, bilakah masalah-masalah ini dijangka akan dapat penyelesaian?;
- (iii) berapakah pemohon untuk dapatkan rumah PPR datang daripada warga Tebrau;
- (iv) apakah rancangan kementerian yang seterusnya untuk membantu warga Tebrau yang telah dihalau keluar rumah

sewa swasta atas sebab ada tunggakan sewa supaya mereka tidak menjadi gelandangan; dan

- (v) apakah tindakan yang sewajarnya diambil oleh kerajaan untuk menempatkan gelandangan yang sedia ada?

Sekian, terima kasih.

2.40 ptg.

Timbalan Menteri Perumahan dan Kerajaan Tempatan [Dato' Sri Dr. Haji Ismail bin Abd Muttalib]: *Bismillahi Rahmani Rahim. Assalamualaikum warahmatullahi wabarakatuh.* Salam sejahtera. Terima kasih Tuan Yang di-Pertua, terima kasih Yang Berhormat Tebrau atas keprihatinan Yang Berhormat yang tidak jemu-jemu tentang keperluan masyarakat dan penduduk di kawasan Tebrau dan keperluan perumahan.

Tuan Yang di-Pertua, untuk makluman Ahli Yang Berhormat, PPR Pelangi Indah telah siap dibina pada 21 Oktober 2019 dan pihak kementerian telah menyerahkan projek ini kepada Pejabat Setiausaha Kerajaan Negeri Johor pada 1 Jun 2020 melibatkan 442 unit rumah. Projek ini tidak mempunyai sebarang masalah dan sedang diuruskan oleh Pejabat Setiausaha Kerajaan Negeri Johor. Yang Berhormat ya.

Untuk makluman Ahli Yang Berhormat juga, kelewatan pengisian unit Program Perumahan Rakyat (PPR) Pelangi Indah di negeri Johor adalah disebabkan oleh kerja penambahbaikan yang terpaksa dilakukan terhadap Sistem Perumahan Johor (SPJ). SPJ perlu ditambah baik kerana Kerajaan Negeri Johor telah melaksanakan perubahan dan penambahbaikan kepada Dasar Penawaran Rumah PPR dan Rumah Sewa Kerajaan (RSK) Negeri Johor. Perubahan ini adalah melibatkan prosedur berkaitan permohonan, semakan, tapisan, agihan unit serta tatacara penawaran. Penambahbaikan ini dilakukan agar penawaran unit kediaman lebih telus dan berfokus kepada pemohon yang benar-benar layak sahaja. Penambahbaikan dasar ini telah mula diguna pakai di negeri Johor bermula bulan Februari 2021 yang lalu.

Untuk makluman Ahli Yang Berhormat juga, jumlah pemohon yang berdaftar di dalam SPJ bagi mendapatkan tawaran PPR Pelangi Indah adalah seramai 670 orang. Sehubungan itu, pihak SUK Johor telah membuat semakan pada bulan April hingga Mei 2021 dengan meneliti semula status terkini butiran pemohon, tambahan dokumen permohonan yang dihantar serta laluan khas bagi penerima bantuan

bulanan Majlis Agama Islam Negeri Johor, Jabatan Kebajikan Masyarakat, Yayasan Bandaraya, PERKESO atau penama yang berdaftar dalam sistem eKasih.

Daripada jumlah tersebut, sebanyak 531 orang pemohon telah di senarai pendek mengikut beberapa kategori. Pecahan kategori penawaran adalah seperti berikut:

Bil	Kategori Pemohon	Jumlah (orang)
1.	Orang awam (Undian terbuka)	332
2.	Penerima bantuan Jabatan Kebajikan Masyarakat (JKM), Majlis Agama Islam Negeri Johor (MAIJ) dan Yayasan Bandaraya Johor Bahru	22
3.	Setinggalan	88
Jumlah keseluruhan		442

Sebanyak 442 orang pemohon akan ditempatkan di PPR Pelangi Indah. Baki 89 orang pemohon pula akan dicadangkan untuk ditempatkan di PPR Sungai Melana 2, Johor Bahru, Johor. Sehingga 30 September 2021, sebanyak 22 surat tawaran telah dikeluarkan oleh Pejabat Setiausaha Kerajaan Negeri Johor kepada pemohon yang layak manakala baki sebanyak 420 unit lagi akan ditawarkan sebaik sahaja nama pemohon yang berjaya dimuktamadkan selewat-lewatnya pada bulan Disember 2021.

Untuk makluman Ahli Yang Berhormat juga, berdasarkan kepada rekod pemohon yang berdaftar di dalam SPJ sehingga 30 September 2021, seramai 228 daripada 531 pemohon yang di senarai pendek adalah terdiri daripada penduduk Tebrau, manakala selebihnya adalah penduduk sekitar Johor Bahru, Pulai dan Pasir Gudang.

Dalam menangani isu penyewa yang terkesan akibat COVID-19 yang tidak mampu membayar sewa dan terpaksa keluar dari rumah sewa – sepertimana Yang Berhormat Tebrau kata tadi, tidur di kereta dan sebagainya, baru-baru ini Yang Amat Berhormat Perdana Menteri telah melancarkan Inisiatif Kediaman Keluarga Malaysia ataupun Rumah IKRAM Keluarga Malaysia. Objektif utama program ini adalah untuk memberikan perlindungan melalui penyediaan kediaman yang berdaya huni, selesa dan selamat kepada rakyat yang kehilangan tempat tinggal akibat kesan sampingan COVID-19. Selain itu, inisiatif ini juga turut menyediakan kemudahan insentif melalui sewaan serendah RM124 sebulan untuk mengurangkan beban kewangan yang ditanggung oleh rakyat.

Sebagai permulaan, sebanyak 2,000 unit rumah sedia ada ditawarkan untuk Rumah IKRAM Keluarga Malaysia di beberapa lokasi PPR di seluruh negara

termasuklah di negeri Johor iaitu di PPR Sungai Melana Fasa 2, Johor Bahru. Penerima manfaat ini seterusnya akan menerima pengecualian bayaran sewaan untuk enam bulan yang pertama. Maknanya, yang kita tawarkan, enam bulan pertama kita akan kecualikan sewa kepada mereka. Sehubungan itu, bagi penduduk Tebrau yang kehilangan tempat tinggal akibat pandemik COVID-19 yang menepati syarat, bolehlah membuat permohonan untuk Rumah IKRAM Keluarga Malaysia melalui Pejabat Setiausaha Kerajaan Negeri Johor, dengan merujuk iklan yang dikeluarkan.

Dalam menangani isu gelandangan pula, semua pihak termasuklah agensi kerajaan Persekutuan, kerajaan negeri, pertubuhan bukan kerajaan atau pihak-pihak yang berkaitan perlu memainkan peranan masing-masing dalam membantu golongan ini khususnya daripada segi penempatan mereka.

Justeru, Tuan Yang di-Pertua, Kementerian dan Kerajaan Negeri Johor akan terus melaksanakan inisiatif-inisiatif yang bersesuaian untuk memastikan kesinambungan bantuan kepada golongan terkesan khususnya penduduk rumah setinggan termasuklah golongan gelandangan melalui program-program yang bersesuaian. Terima kasih, Tuan Yang di-Pertua.

Tuan Yang di-Pertua: Terima kasih Yang Berhormat Timbalan Menteri. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang, hari Selasa, 12 Oktober 2021. *Assalamualaikum warahmatullaahi wabarakaatuh*. Salam sejahtera semua.

[Kamar Khas ditangguhkan pada pukul 2.47 petang]